

MOSTAR: Radni ručak Američke trgovinske komore u BiH



Američka trgovinska komora BiH upozorila je da će razvoj privrede u našoj zemlji nastaviti bilježiti negativan trend ukoliko politički lideri u BiH ne pokažu spremnost za kreiranje zajedničke vizije o budućnosti i institucionalnom uređenju zemlje.

Kompanije, članice AmChama, imale su priliku razgovarati o ključnim političkim i privrednim temama sa Patrikom Munom, američkim ambasadorom u BiH.

“Želim svakom od vas čestitati na nastojanju da se poboljša poslovna klima u BiH, da vam to nije važno vi ne biste danas bili ovdje, nadam se da ćete se svi posvetiti izgradnji AmCham-a kao jedne snažne organizacije za lobiranje sa ciljem poboljšanja poslovne klime”, rekao je Mun.

Američka trgovinska komora je prisutnima prezentirala svoje aktivnosti, ali i izrazila zabrinutost u vezi sa trenutnom ekonomskom situacijom u BiH. Alarmantnim je ocjenila negativan trend ekonomskog oporavka zemlje u 2012. godini.

„Nedavno objavljen izvještaj Evropske komisije prema kojem je BiH postigla ograničen napredak na putu ka EU u 2012. godini, te odsutnost volje političkih lidera za postizanjem dogovora, zabrinjava poslovnu zajednicu u našoj zemlji“, istakao je Faruk Telibećirović, predsjednik AmChama i dodao: “Američka trgovinska komora, zalaže se za partnerski odnos poslovne zajednice sa institucijama vlasti u BiH s ciljem da zajedničkim snagama krenemo naprijed“.

Evidentno je da se kompanije u Bosni i Hercegovini susreću sa raznim preprekama koje im otežavaju poslovanje u ionako teškom privrednom okruženju.

„U poređenju sa drugim zemljama, najveći nedostaci poslovanja u BiH, su visok nivo nenaplaćenih potraživanja, korupcija, relativno malo tržište, te spora administracija“, rekao je Slaviša Krunić, predsjednik uprave kompanije Sector Security, članice AmChama i suorganizatora današnjeg skupa u Mostaru, te dodao: “Sastanci poput današnjeg dobra su prilika da o problemima razgovaramo i razmijenimo iskustva koja su svima dragocjena”.